


Книгаен тодматскон

## Шунды кадь пиштэ



Нылпиослы выль книга.

**«Удмуртия» издательствоын потэм «Туала удмурт нылпи литература» (6+) антология шунды кадь пиштэ, тусыныз гинэ но мылкыдэз жутэ.**

Книгаен тодматсконэз радъязы Йёскалык библиотекаысь ужасьёс. Антологиез киязы кутэмъёс пöлын нырысьёсыз вал удмурт писательёс Вячеслав Ар-Серги, Вениамин Ившин, Ульфат Бадретдинов, Елена Миннигараева но Пётр Захаров. Антологиез дунъяз Печатья но ивор вöлмытонъя агентстволэн кивалтйез Александр Валов но.

«Удмуртия» издательстволэн кивалтйез Юрий Кузнецов верамъя, книга поттон удысын удмурт калык шонер сюрестй вамышъя. Удмурт кыля, литература учебникъёс федерал перечене пыртэмын. Со сяна, 3-7 аресъем пинальёслы алигес 4 хрестоматия (котькудйз 2 люкетлэсь пöрме) поттэмын! Хрестоматиос, антологиос литература айсберглен йылыз гинэ луо ке но, соосъя валаны луэ туалала литературалэсь огъя туссэ.

Книгаен тодматскыны вуылйз культура министр Владимир Соловьёв но. Удмуртиысь библиотекаосты котыръякуз, со библиотекарьёслэсь көтжожжэс тодэм: пинальёслы анай кылын книгаос уг тырмо, удмурт кыля кружокъёслы материал öжыт. Ижысь Нылпиослен но егитъёслэн библиотеказылен кивалтйезлы Людмила Жикиналы но та югдур тодмо. Соин нылпи антологилы туж шумпотано, но малпаськытйсь ужпумъёс но вань. Озыы Ульфат Бадретдинов писатель лыдъям: антологие пырем 41 авторъёслэн шоро-куспо арлыдзы — 60 арес, 8 автор гинэ 50 ареслэсь егитгес. Озыен, книга поттон сяна, выль авторъёс будэтон сярись сюлмаськоно.

Виктория КРАМОВА